



Uffeci communal Lumnezia / Gemeindeamt Lumnezia

Canzlia communal / Gemeindekanzlei

7144 Vella

Tel 081 920 60 00

Fax 081 920 60 18

e-mail: info@lumnezia.ch

www.lumnezia.ch

PROTOCOL RADUNONZA COMUNALA LUMNEZIA 16 DA MARS 2018

2018/01

16 DA MARS 2018
CANZLIA COMUNALA LUMNEZIA
Palus 32D, 7144 Vella

Gliesta da tractandas

1.	Avertura ed elecziun dils dumbravuschs.....	2
2.	Protocol radunonza communal 15 da december 2017 (2017/04).....	2
3.	Fundaziun dalla Infra Mundaun AG	2
	a. Fundaziun d'ina societad d'infrastructura comunabla (societad acziunara) ensemen cun la vischnaunca da Sursaissa Mundaun e las pendicularas Sursaissa Mundaun ..	3
	b. Participaziun dalla vischnaunca Lumnezia alla societad d'infrastructura cun ina summa da CHF 160'000.00	3
4.	Project da sanar la via Quadra – Sogn Bistgaun a Degen: cuvrida da betun	4
	a. Approbaziun dil project.....	4
	b. Concessiun dil credit da CHF 200'000	4
5.	Project per plaz da fermada, da semenar e da parcar, passapei e senda a Valgronda a Cumbel.....	4
	a. Approbaziun dil project.....	5
	b. Concessiun dil credit da CHF 402'000	5
6.	Project via e parcadi Puzzatsch - Parvalsauns a Vrin	5
	a. Approbaziun dil project.....	6
	b. Concessiun dil credit da CHF 566'000 per la sanaziun dalla via Puzzatsch - Parvalsauns	6
	c. Concessiun dil credit da CHF 200'000 pigl engrondiment parcadi e per ina tualetta publica a Parvalsauns	6
7.	Project punt sur il Glogn da Bigliel a Surcasti – Disla a Tersnaus	6
	a. Approbaziun dil project.....	6
	b. Concessiun dil credit da CHF 170'000	6
8.	Cumpra auto-cistiarna da pumpiers.....	6
	a. Concessiun dil credit da CHF 450'000	6
9.	Rendaquen da projects	7
	a. Remplazzament dil scaldament el stabiliment da scola Cuschnaus 172, a Cumbel – Morissen	8
	b. Regulaziun dils indrezs da scaldament e ventilaziun el stabiliment ella casa da scola e halla plurivalenta Sutvitg 28E, a Vella	8
10.	Varia.....	8

Protocol dalla radunonza communal Lumnezia (2018/01)

Datum: Venderdis, ils 16 da mars 2018
 Liug: Halla plurivalenta dalla casa da scola Sutvitg 28E, 7144 Vella
 Cuoz: 20:00 – 21:30 uras
 Presents: 84 votantas e votants, 3 hosps
 Parsura: Duri Blumenthal, president communal
 Actuar: Marcus Cavegn, canzlist communal

Tractandas

1. Avertura ed elecziun dils dumbravuschs

Il president communal Duri Blumenthal arva la radunonza communal fagend beinvegni als presents. El constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

La gliesta da tractandas dils 23 da fevrer 2018 vegn midada sin proposta dil president communal. La tractanda 7. Project punt sur il Glogn da Bigliel a Surcasti – Disla a Tersnaus vegn spustada, cun quei ch'igl ei buca reussiu d'anflar ina sligiaziun definitiva pil dretg da passadi che dat access alla punt, per quei che las pretensiuns d'indemnisar il dretg ein buca stadas acceptablas.

La radunonza communal approbescha la gliesta da tractandas dils 23 da fevrer 2018 presentada dalla suprastonza communal cun quella midada.

Seschau perstgisar han

- Hilda Livers, commembra dalla cumissiun da gestiun Lumnezia;
- Martin Rupp, schef dil departament communal per cultura Lumnezia;
- Anton Derungs;
- Giusep Capeder, emploiau dall'administraziun communal Lumnezia

La radunonza elegia dus dumbravuschs:

- Robert Albin, Tersnaus
- Giovanni De Giorgi, Vella.

2. Protocol radunonza communal 15 da december 2017 (2017/04)

Il protocol dalla davosa radunonza communal dils 15 da december 2017 ei staus exponius ella canzlia communal ed ella pagina d'internet dalla vischnaunca durant 30 gis.

Il president communal Duri Blumenthal constatescha, ch'igl ei buca vegniu inoltrau recuors en scret aschia ch'il protocol dalla davosa radunonza communal dils 15 da december 2017 (2017/04) vala sco approbaus tenor art. 34 dalla constituziun dalla vischnaunca Lumnezia.

3. Fundaziun dalla Infra Mundaun AG

Presentaziun

Il president communal Duri Blumenthal informescha la radunonza communal dalla situaziun actuala dil plan da master "Entuorn il Mundaun".

Ella votaziun communal dils 26 da november 2017 davart la participaziun ad ina societad d'infrastructura comunabla ensemen cun la vischnaunca Sursaisa Mundaun e las pendicularas Sursaisa Mundaun ha la vischnaunca da Lumnezia acceptau il project cun 385 encunter 237 vuschs. Cheutras ha il pievel

- approbau la fundaziun d'ina societad d'infrastructura comunabla (societad acziunara) ensemen cun las vischnauncas Sursaisa Mundaun ed Ilanz/Glion e las pendicularas Sursaisa Mundaun.

- acceptau la participaziun dalla vischnaunca Lumnezia alla societad d'infrastructura cun ina summa da 2.41 milliuns francs.
- surpriu ina garanzia communal da 6.05 milliuns francs per la societad d'infrastructura ch'ei da fundar.

La vischnaunca da Sursaiassa Mundaun haveva gia acceptau il project a caschun dalla radunonza communal dils 15 da settember 2017 cun 136 encunter neginas vuschs. Perencunter ha la vischnaunca da Ilanz/Glion fiers il project cun 522 encunter 412 vuschs ella votaziun dils 26 da november 2017. La fundaziun dalla societad d'infrastructura saveva succeder mo sche tuttas treis vischnauncas e las pendicularas devan il consentiment.

Suenter il na dalla vischnaunca Ilanz/Glion han ils ulteriurs partenaris da sedecider co ir vinavon en caussa. La collaboraziun duei cuntinuar cun la vischnaunca Sursaiassa Mundaun e las pendicularas Sursaiassa Mundaun cun far pass per pass. Igl emprem duei vegnir fundada ina societad acziunara culs treis partenaris. Il project duei vegnir surluvraus e lu presentaus per decisiun alla radunonza communal respectivamein alla cuminonza dils votants all'urna per ch'il pievel sappi prender influenza.

Il capital d'acziun duei muntar a CHF 400'000, repartgi sin:

Vischnaunca Lumnezia	40%	CHF	160'000
Vischnaunca Obersaxen Mundaun	40%	CHF	160'000
Pendicularas	20%	CHF	80'000

Ils partenaris duein vegnir representai el cussegl administrativ en relaziun da lur participaziun vid il capital d'acziun, numnadamein mintgamai dus commembers dallas vischnauncas Lumnezia e Sursaiassa Mundaun e dad in commember dallas pendicularas. Ils representants dalla vischnaunca Lumnezia vegnan nominai dalla suprastonza communal. La gruppa preparatoria secumpona gia da tschun commembers.

- Duri Blumenthal e Curdin Capeder dalla suprastonza communal Lumnezia
- Ernst Sax e Michael Cahenzli dalla suprastonza communal Obersaxen Mundaun
- Sep Brunner, directur dallas pendicularas Sursaiassa Mundaun.

Il cussegl administrativ dalla societad acziunara ha il pensum da decider tgei projects che vegnan elaborai en detagl. Il concept vegn lu presentaus alla radunonza communal.

En in votum da discussiun vegn beneventau da proceder pass per pass. Ussa vegni buca concedius in schec en blanco, il pievel hagi la controlla. Alla purschida da stad seigi vegniu dau dapli peisa. Glied dalla cultura duessi era vegnir representada els projects da stad.

Decisiuns

- a. Fundaziun d'ina societad d'infrastructura communal (societad acziunara) ensemen cun la vischnaunca da Sursaiassa Mundaun e las pendicularas Sursaiassa Mundaun
La radunonza communal decida cun 81 vuschs e senza cuntravusch da separticipar alla fundaziun societad d'infrastructura communal SA ensemen cun la vischnaunca da Sursaiassa Mundaun e las pendicularas Sursaiassa Mundaun.
- b. Participaziun dalla vischnaunca Lumnezia alla societad d'infrastructura cun ina summa da CHF 160'000.00
La radunonza communal decida cun 82 vuschs e senza cuntravusch in credit da CHF 160'000 per participar dalla societad d'infrastructura Mundaun SA.

4. Project da sanar la via Quadra – Sogn Bistgaun a Degen: cuvrada da betun

Presentaziun

El preventiv dil quen d'investiziuns 2018 ei cuntenida ina summa da CHF 200'000.00 per lavurs da cuvrada via Quadra – Sogn Bistgaun a Degen. Quella via vegn duvrada stediamein e sesanfla en in stadi munglus. Igl uffeci d'agricultura e geoinformaziun dil Grischun sustegn sanaziuns da vias da meglieraziun cun contribuziuns, spetga denton era che la vischnaunca vegni activa e fetschi sezza sanaziuns da tschancuns cuorts da vias sin agen cuost. Aschia ha la vischnaunca da Lumnezia fatg igl onn vargau la cuvrada da betun dalla via Resgia – Tgiern a Vrin.

Ina part dalla via Quadra – Sogn Bistgaun sesanfla enteifer il territori da baghegiar, igl auter enteifer la zona agricola. La via vegn era duvrada per access al plaz da ballapei Sogn Bistgan, al stabiliment da tir Rofna ed agl open air Lumnezia. Per il perimeter che sesanfla enteifer la zona da baghegiar eisi prevediu da far ina procedura da contribuziun.

Prevedida ei ina cuvrada da betun sin la via Quadra – Sogn Bistgaun e d'ulivar il plaz denter la seiv dalla vart sut dil plaz da ballapei e la via communal.

La calculaziun da cuosts cuntegn suandontas posiziuns.

Lavurs da construcziun	CHF	173'672.00
Publicaziun, survegionza, geometer	CHF	10'000.00
Nunprevediu, reserva	CHF	16'328.00
Total cuosts inclusiv 7.7 % taglia sin valeta augmentada TVA	CHF	200'000.00

Proposta

La suprastanza communal propona d'approbar il project da da conceder il credit da baghegiar.

Decisiun

- Approbaziun dil project
- Concessiun dil credit da CHF 200'000

La radunonza communal decida cun la gronda maiortad dils presents e senza cuntravusch d'approbar il project e da conceder il credit da CHF 200'000.

5. Project per plaz da fermada, da semenar e da parcar, passapei e senda a Valgronda a Cumbel

Presentaziun

En connex cun la sanaziun dalla via cantunala ei prevedida ina remedura dil plaz da fermada pigl auto da posta ed in passapei. Quel ei necessaris per eliminar il prighel per ils pedunzs che passan directamein sin la via cantunala.

Daniel Solèr, schef dil departament communal per traffic, ovras publicas ed ambient, presenta il plan da project e la calculaziun da cuosts.

Il project secumpona da suandontas parts.

Plaz da fermada per autos da posta	CHF	160'000.00
Plaz da semenar per bus da scola	CHF	51'000.00
Senda enviers s. Murezi	CHF	30'000.00
Plaz da parcar	CHF	39'000.00
Passapei	CHF	122'000.00
Cuosts totals	CHF	402'000.00

Per la finanziaziun dil plaz da fermada ha il cantun segirau tier 30% dils cuosts restonts da CHF 112'000, maximalmein CHF 33'600, pil plaz da semenar dil bus da scola 30% dils cuosts imputabels da CHF 51'000, maximalmein CHF 15'300, e pil passapei ina contribuziun da 35% dils cuosts tenor preventiv dils 7 da december 2015 da CHF 122'000.

Proposta

La suprastanza communal propona d'approbar il project e conceder in credit da CHF 402'000.

Decisiun

- a. Approbaziun dil project
- b. Concessiun dil credit da CHF 402'000

La radunonza communal decida cun la gronda maiortad dils presents e senza cuntravusch d'approbar il project per plaz da fermada, da semenar e da parcar, passapei e senda a Valgronda a Cumbel e da conceder il credit da CHF 402'000.

6. Project via e parcadi Puzzatsch - Parvalsauns a Vrin

La via da Tgiern entscheiva dadens igl uclaun da Puzzatsch e colligia il territori dallas alps da Parvalsauns, Diesrut e Ramosa. Alla fin da quella via entscheiva la senda dalla Greina. La via ha ina ladezia da 3.0 meters ed era vegnida baghegiada avon varga 40 onns. Ils mirs da sustegn dalla vart sut dalla via ein vegni construi en betun e senza pei. Plirs da quels mirs ein cupitgai ed uiarschs. Entgins ein vegni remplazzai cun construcziuns da lenna rodonda per segirar la plaunca. Quellas ein denton era periclitadas da cupitgar. La segirtad ei buca pli dada. La via traverseschaa la zona d'agricultura e sesanfla per part ella zona da prighel cotschna.

Previu ei da sanar la via e da francar ils mirs da betun cun ancras. La cuvrada duei vegnir fatga cun duas leisas da betun che han mintgamai ina ladezia da 1 m. Il parcadi existent duei vegnir engrondius. Sper quei plaz ei prevedida ina tualetta publica ed in suttetg per ils viandonts en cass da stempraus. La suprastanza communal ei cunscienta che la realisaziun dils parcadis vegn buca ad ir sur las rundas senza incaps. Denton preveda ella buca da far mo cosmetica

La calculaziun da cuosts per la sanaziun dalla via Puzzatsch – Parvalsauns cuntegn suandontas posiziuns.

Total lavurs da construcziun incl. taglia sin valeta augmentada TVA	CHF	451'666.90
Project, survigilanza, geolog ed accumpignament ecologic	CHF	54'000.00
Segiradas, lubientschas, etc.	CHF	8'000.00
Nunprevediu e reserva ca. 8%	CHF	52'333.10
Total calculaziun da cuosts	CHF	566'000.00

La calculaziun da cuosts per igl engrondiment dil parcadi, ina tualetta publica ed ina suosta a Parvalsauns secumpona da suandontas parts.

Parcadi	CHF	100'213.00
Tualetta publica e suosta	CHF	58'158.00
Project, survigilanza, geolog ed accumpignament ecologic	CHF	18'000.00
Segiradas, lubientschas, etc.	CHF	6'000.00
Nunprevediu, reserva	CHF	17'629.00
Cuosts totals inclusiv TVA	CHF	200'000.00

Discussiun

Ella discussiun vegn ofniau da far patratgs co utilizar ils parcadis e da far pagar pil diever da quels. La suprastanza communal sefatschenta da present cun in uorden da parcadi per l'entira vischnaunca ed evaluescha in concept. Ella less buca far pagar ils parcadis en mintga liug.

En in votum vegn mess en damonda, sch'ils parcadis ein in summa necessaris, demai ch'ils bus van ussa tochen S. Giusep respectivamein Puzzatsch.

Proposta

La suprazionza communal propona d'approbar ils projects per la sanaziun dalla via Puzzatsch – Parvalsauns e pigl engrondiment dil parcadi, tualetta publica e suosta a Parvalsauns e da conceder ils credits tenor calculaziun da cuosts.

Decisiun

- a. Approbaziun dil project
- b. Concessiun dil credit da CHF 566'000 per la sanaziun dalla via Puzzatsch - Parvalsauns
- c. Concessiun dil credit da CHF 200'000 pigl engrondiment parcadi e per ina tualetta publica a Parvalsauns

La radunonza communal decida cun la gronda maiortad dils presents e senza cuntravusch d'approbar il project via e parcadi Puzzatsch - Parvalsauns a Vrin e da conceder ils dus credits.

7. Project punt sur il Glogn da Bigliel a Surcasti – Disla a Tersnaus

- a. Approbaziun dil project
- b. Concessiun dil credit da CHF 170'000

Quella tractanda ei spustada.

8. Cumpra auto-cistiarna da pumpiers**Orientaziun**

La cummissiun da pumpiers dalla vischnaunca Lumnezia ha fatg la proposta da remplazzar igl auto-cistiarna ch'ei staziunau a Cumbel. Quel ei vegnius mess en funcziun avon 37 onns. Il corp da pumpiers Lumnezia veva survegniu quei vehichel igl onn 2008 dalla Argovia. El corrispunda buca pli al basegn dil temps puncto movibladad, funcziun da transportar glied, aua ed equipament da pumpiers. In tal vehichel sto tener silmens 25 onns. El cuosts fetg bia, denton ston ils cuosts vegnir mess en relaziun cun la segirtad che vegn pretendida e giavischada. L'Assicuranza d'edifecis dil cantun Grischun ha garantiu ina contribuziun da 20 % dils cuosts da maximalmein CHF 450'000.

Per igl auto-cistiarna ein vegnidas tratgas en offertas. L'offerta la pli favureivla ei CHF 425'438.52, prezi netto inclusiv taglia sin valeta augmentata TVA da 7.7 %. Cumpru en quei prezi ei era material d'equipament dil vehichel. Igl auto-cistiarna vegness furnius enteifer in onn, pia igl onn 2019, sche la radunonza communal conceda il credit per la cumpra dil vehichel.

Sin fiera dat ei era autos d'ocasiun. Ils cuosts per vehichels da 15 – 20 onns ein denton aunc adina aults.

All'entschatta vegness igl auto-cistiarna staziunau el baghetg da pumpiers ad Uors. Igl ei denton previu da baghegiar in niev local da pumpiers a Vattiz, che duei remplazzar ils locals da pumpiers a Cumbel ed a Vella.

Decisiun

- a. Concessiun dil credit da CHF 450'000

La radunonza communal decida cun la gronda maiortad dils presents, senza cuntravusch e cun in'abstenziun da conceder il credit da CHF 450'000.

9. Rendaquen da projects

La radunonza communal da dils 6 da mars 2015 ha approbau ils projects da remplazzar e reparar ils indrezs da scaldar en treis stabiliments da scola dalla vischnaunca.

- a) Remplazzament scaldament el stabiliment da scola Cuschnaus 172, Cumbel-Morissen
 - Credit da CHF 220'000.00
- b) Remplazzament dil scaldament dil stabiliment da scola Vigela 1B / 1C, Lumbrein
 - Credit da CHF 230'000.00
- c) Regulaziun dils indrezs da scaldament e ventilaziun el stabiliment dalla casa da scola e halla plurivalenta Sutvitg 28E, Vella
 - Credit da CHF 280'000.00

Il scaldament dil stabiliment da scola Cuschnaus 172, Cumbel – Morissen ei vegnius remplazzaus. Medemamein ei la regulaziun dils indrezs da scaldament e ventilaziun el stabiliment dalla casa da scola e halla plurivalenta Sutvitg 28E a Vella vegnida installada. Il scaldament pil stabiliment da scola Vigela 1B / 1C, Lumbrein, ei aunc buca vegnius remplazzaus.

- a. Remplazzament dil scaldament el stabiliment da scola Cuschnaus 172, a Cumbel - Morissen

Il scaldament dil stabiliment da scola Cuschnaus 172, Cumbel – Morissen, ei vegnius remplazzaus, perquei che quel veva ina sfendaglia e perdeva ualti fetg. Pervia da quei eran las emissiuns memia aultas. All'entschatta ei buca vegniu risguardau, che la prestaziun dil scaldament era s'augmentada considerablamein e che las stanzas da scola vegnevan memia caudas. Perquei ha stuiu vegnir fatga in repartiziun individuala sin las singulas stanzas cun installar ventils per mintga stanza da scola. Ord quei motiv ha la suprastanza communal decidu il 06 da zercladur 2016 da conceder in credit da CHF 65'000 per igl indrez da regular la temperatura en casa da scola a Cuschnaus, che cuntegn ina midada dils repartgiders dil scaldament da plantschiu, l'installaziun electrica cun ils ventils e la regulaziun cun integraziun el pilotadi. Dalla summa da credit san vegnir curclai rodond CHF 24'000 cun igl avanzament dil credit per la sanaziun dalla pegna.

Pil remplazzament scaldament el stabiliment da scola Cuschnaus 172 ei vegnius concedius in credit dalla radunonza communal da CHF 220'000.00. Ils cuosts effectivs ein stai CHF 197'185.30, aschia ch'ils cuosts ein CHF 22'814.70 sut il preventiv. Pil project supplementar per la regulaziun individuala ellas singulas stanzas ha la suprastanza communal dau in credit da CHF 65'000.00. Ils cuosts effectivs ein stai CHF 59'881.65, aschia ch'ils cuosts ein CHF 5'118.35 sut il preventiv. En tut eran vegni concedi credits da CHF 285'000.00. Ils cuosts effectivs ein stai CHF 257'066.95, aschia ch'ils cuosts ein CHF 27'933.05 pli bass ch'ils credits concedi.

- b. Regulaziun dils indrezs da scaldament e ventilaziun el stabiliment ella casa da scola e halla plurivalenta Sutvitg 28E, a Vella

La suprastanza communal ha giu decidu il 25 da fenadur 2015 el rom da sias cumpetenzas finanzialas da far investziuns supplementaras en connex cul project da detagl per la regulaziun dils indrezs da scaldament e ventilaziun el stabiliment dalla casa da scola e halla plurivalenta Sutvitg 28E, Vella, numnadamein da midar il scumiader da calira aua – aria per scaldar la casa da scola e la halla plurivalenta e da midar ils bishels da distribuziun per las gruppas da scaldament. Ella ha concediu in credit da CHF 30'000.00 per quei intent. En tut ei staus a disposiziun in credit da CHF 310'000.00. Ils cuosts effectivs ch'ei vegni cudischi el project cumprendan ina summa da CHF 309'965.50, quei che sutpassa ils credits per CHF 34.50. Lavurs buca prevedidas han cumpigliau il remplazzament da dus motors dalla ventilaziun. Enstagl da tals cun ina impulsziun da tschentas ein vegni montai motors cun ina transmissiun directa.

Decisiun

- a. Remplazzament dil scaldament el stabiliment da scola Cuschnaus 172, a Cumbel – Morissen

La radunonza communal decida cun la gronda majoritad dils presents e senza cuntravusch d'approbar il rendaquen

- b. Regulaziun dils indrezs da scaldament e ventilaziun el stabiliment ella casa da scola e halla plurivalenta Sutvitg 28E, a Vella

La radunonza communal decida cun la gronda majoritad dils presents e senza cuntravusch d'approbar il rendaquen

10. Varia

1) Punt dalla via cantunala sur la val da Tersnaus ad Uors

Igl uffeci da construcziun bassa dil cantun Grischun ha communicau che la punt dalla via cantunala sur la val da Tersnaus ad Uors vegni sanada ni remplazzada ils proxims onns.

2) Susteniment dil cantun per projects da turissem relevants pil sistem

Rest Martin Cabalzar fa d'udir ch'il cantun Grischun metta a disposiziun 20 milliuns francs per projects da turissem ch'el valetescha sco relevants pil sistem. Tochen ussa ein vegnidas concedidas contribuziuns mo ordeifer la regiun Surselva, aschia era 1.5 milliuns francs per ina piazza da giug a Flem ed ina contribuziun per in hotel a Pontresina. El sedamonda sche la Lumnezia hagi buca era objects relevants pil sistem.

Apparentamein vegn Flem subsummaus el territori romontsch ed ella regiun Surselva enteifer il program d'implementaziun dalla nova politica regionala. Il program San Gottardo 2020 para da sia vart da survegnir daners ton sco giavischau.

En Lumnezia vegnan en damonda per talas contribuziuns il plan da master "Entuorn il Mudaun" ed era il hotel sigl areal dalla zona da sport Bual a Vella.

3) Diever d'immobillas dalla vischnaunca Lumnezia

Silvio Capeder damonda sche la vischnaunca fuss prompta d'investar en objects che vegnan buca duvrai pli pigl anteriur intent sco las casas da scola a Lumbrein e Vrin. La casa da scola da Lumbrein savessi vegnir duvrada sco suttetg per viandonts ni per tals che van cun calzers da neiv igl unviern.

Primus Cavegn fa attents, che la vischnaunca dispona gia d'in menaschi d'albiert ella Sentupada a Vignogn. Ils cuosts da menaschi ein mo curclai, perquei che la fundaziun Linsi sustegn quel finanziamein. Per in menaschi rentabel sto igl albiert ver bunas frequenzas d'occupaziun. Ils cuosts per marketing astgan era buca vegnir sutschazegiai.

4) Dismessa da seivs duront il temps d'unviern

Toni Arpagaus fa attents che diversas seivs el vischinadi da Cumbel vegnien buca dismissas suenter la pasculaziun. Avon la fusiun da vischnauncas valevi a Cumbel, che las seivs ston ir naven. Quellas seivs seigien in prighel per la selvaschina. La survigiladra da catscha hagi ofniau ch'ei seigi caussa dalla vischnaunca da procurar che quellas seivs vegnien allontanadas. Toni Arpagaus vul saver, sche la vischnaunca hagi il dretg da castigiar ni sch'ei seigi pusseivel da trer giu pagamenti directs per la cultivaziun da funs.

Il president communal replica ch'ei vali il status quo avon la fusiun per l'agricultura. Ils reglaments da Cumbel per l'agricultura valien aunc.

Toni Arpagaus vul saver tgi che controlleschi e co ils reglaments vegnien implementai, sch'ei seigi il cau departament per agricultura Lumnezia.

Il president communal fa attents, che la vischnaunca hagi buca ina polizia, cunterfatgas ston vegnir annunziadas alla vischnaunca.

5) Segirtad sin via cantunala denter Suadetsch ed il Bogn da Peiden

Luregn Giusep Blumenthal fa attents alla problematica da segirtad sin la via cantunala denter Suadetsch ed il Bogn da Peiden. Diversas gadas ein autos i leu sur via ora. Eventualmein fussi ei da far barrieras da segirtad.

6) Finiziun

Il president communal Duri Blumenthal engrazia als convischins che han priu part dalla radunonza communal per lur preschientscha e buna collavuraziun ed envida els da prender part digl aperitiv che vegn purschius suenter la radunonza.

7144 Vella, ils 16 da mars 2018

Il president:

Igl actuar:

Duri Blumenthal

Marcus Cavegn